

摘藻堂四庫全書薈要

集部

欽定四庫全書薈要

集部

御選明詩卷二十一

詳校官原任主事<sub>臣</sub>李斯咏

欽定四庫全書薈要卷一萬八千五百二十一 集部

御選明詩卷二十一

五言古詩六

周述

玩秀軒

華軒臨清流秀色堪攬結霞彩相蕩漾波光互明滅  
花飛渡頭春帆落洲上月縱觀心目超靜對形神悅  
應共滄浪人濯纓笑予拙



李時勉

古詩為扶風竇滔妻作

深閨有思婦慘悽亦何為容華不自惜獨理流黃機言  
將成匹帛多裁遊子衣衣新忽變故恩愛從此哀以茲  
殷勤意翻作長恨辭

蘭茝被幽畹桃李媚春陽新婚結綢繆鞶衿散芬芳棄  
置父母歡婉婉君子傍白日麗朝彩朗月澄夜光矢心  
以相顧願為鴛與鴦

昧旦不能寐攬衣起中堂織縑與織素誰復知短長尺  
尺組幽思迴還遂成章絨之戒僅御欲以寄遠方宛轉  
達苦志敢期昔所伉

別久意恒親覽辭念愈結巾車適千里倏忽已超越鳴  
琴諧古調恩愛感離濶夙心諒所負慙歎對明月瞻言  
固終始皓首以相悅

王英

自勵

團團匣中鏡皎皎流素光鑒物無遁形妍媸安得藏經  
時苦昏翳遊塵漫飛揚顧此三歎息胡為失其常拂拭  
去瑕垢精采復煌煌衆污不可染持已貴自臧恒當慎  
夙夕惕然以自防

王直

同鄒侍講諸公遊長春宮故址

端居文墨暇郊原風景融爰與衆君子遊眺出崇墉崎  
嶇清磴阻逶迤幽徑通靡靡衆草綠茸茸雜花紅稍窮

林野趣遂造羽人宮  
鸞笙絕遺響  
颺輪不可逢  
頽址剝  
文礎陰廊落綺櫳  
因悲昔時士  
翹首希方蓬

迅颺餘霑收宿雨  
衆流潰鬱鬱高原  
樹好鳥鳴相對農  
家喜暄節荷鋤理  
荒穢昔者鸞鶴居  
今為阡陌會池荷  
新葉小園柳飛花  
碎霞明清川曲雲  
度遠天外景物良  
可懷風味夙所愛  
瀛海浩無垠滄洲  
竟安在

發儀真道中登岸延覽因憶前行

舟行苦遄迴登岸曠  
心目天清浮雲卷  
野秀新雨足澶

漫衆流會杳靄羣山綠風暄花意亂日暖鶯聲續却憶  
同心人無由踵前躅

章敬

鄉山圖為魏仲房題

連山際東溟層巒儼天設陽林耀青葩陰崖餘積雪原  
田莽迢遞煙霞互明滅時菊萎舊裳蒼苔閱行轍雲谷  
杳難尋澗芳那可掇懷故念易盈覽物意彌結遊目愜  
心賞幽期緬垂缺一為莊舄吟浩歌徒激烈

李昌祺

題山水小景

野外少人躅值此佳日遲偶與二三友遊觀賦新詩青  
松藹繁陰碧草含華滋逍遙恣言笑童稚亦娛嬉濟濟  
炫春服悠悠詠清沂茲歡恐難再興盡以為期

湖山佳趣卷

宦遊愜深好乃在名勝區山水自足適況茲職文儒橫  
經有餘閒逍遙出通衢春服各已成遂與童冠俱徘徊

恣言笑登陟忘飢飭晴鳶戾層空弱藻翻文魚至理與  
景會天機獨吾娛悠悠仰川上眷眷懷舞雩詠歌返覺  
舍高興誰能踰

徐道士安處軒

塵氛既屏絕氣宇亦澄鮮心恬境逾寂慮遣情自捐結  
宇依層巖開軒俯重淵遙林含宿雨古樹帶秋煙落花  
晚成積歸鳥夕知還習靜泯衆累守默息萬緣清虛固  
其性聲利豈所便智黜道乃得樸返真斯全將隨鳳鸞

侶以引龜鶴年

端午日遊少林寺

少林聳嵒堯有路達蔥嶺半生懷勝槩老乃踐真境  
縉流遠見迂偏袒仍露頂升高縱遐觀頗覺癡緣屏蒲風  
翻卷帙艾色侵衣領掇蔬僧具供飲騎童汲井自拈清  
淨香作禮爇古鼎超超昔神師順寂同溟滓而于片石  
上留此不滅影竺夏雖異轍皆貴能猛省寒巖許分坐  
禪定畢餘景

魏驥

秋日閒居

秋高風露涼  
明月滿庭戶  
展轉不能眠  
起縱階前步  
美人天一方  
何時遂良晤  
相思熱中腸  
坐覺年華暮

竹

傲彼冰與霜  
陋此桃與李  
籊籊青琅玕  
鸞停而鳳翥  
向我來清風  
九夏涼如洗  
願締金石交  
堅貞保終始

陳全

夢遊匡廬山

夢寐遊匡廬  
晞髮五老峯  
長天散氛翳  
削出金芙蓉  
林谷轉深邃  
溪迴路彌通  
澄江波澹澹  
霽日花濛濛  
陰澗長瑤草  
陽崖明藥叢  
樓臺霄漢上  
雞犬煙蘿中  
杳渺逢羽人  
相期躡仙蹤  
覺來玉堂迴  
彷彿聞疎鐘  
丹梯如可接  
共汝巢雲松

送陳廷器歸長樂

置酒新亭上  
親賓儼成行  
蘭肴雜肥鮮  
綺席羅瓊漿  
顧

茲繾綣情樂飲各盡觴中筵忽不懌援琴撫清商絲桐  
易為感離思擾中腸驪歌首前途僕御促行裝故鄉渺  
何許路繞川原長願為晨風翼送子東南翔

曹閻

期楊士奇不至

羈旅無友生何以慰懷思有客啞適我芳辰以為期深  
叢鳥雀喧窮巷牛羊歸相候清路傍冠佩來何遲我有  
既云具我酒亦已持雖無德與女寫心良在茲子寧不

我即佇望增歔歔仰觀列宿行羨此明月輝令德衆所慕彼留知為誰諒無好賢誠空負緇衣詩

苗衷

楊思敬東郭草亭讌集

芳春條云暮暇日鳴玉鞘羣公夙有約駕言適東郊冷  
卿遠相迎會此文字交開筵俯亭沼次第陳觴肴疎花  
繁檐前好鳥鳴樹梢睠茲百物遂樂飲恣歌嘲

錢幹

新橋驛和余檢討韻

初月生遙甸長流遵枉渚方舟泝長河宵分及前侶維  
梢戒孤征懸燈照清語秋衾夢不成隕籜紛如雨

杜桓

北山草堂和韻

厭彼塵俗喧愛此清幽景雨餘山色佳日落松陰冷不  
見草堂人白雲三萬頃

林誌

菊莊

別業依南山投閒忽成趣  
白露朝欲晞黃衣滿籬戶  
餐英慨前修采之恐遲暮  
苦無三徑資眷此歸來賦

鄭閻

懷林鴻

寒月照古樹朔風吹城樓  
如何咫尺居致我千里愁  
俯景暫自遣浩歌誰為酬  
思君若逝水朝暮長悠悠

陳輝

旅次武林期叔剛修撰不至

寓宇悶幽寂羈懷轉淒其  
況茲梅雨候值此麥風時  
閒登溪上樓悵望吳天涯  
長風卷潮來倏忽銀屋移  
潮水尚有信我行豈無期  
緬懷同心人惻然起遐思

曾鶴齡

羅知州之交趾分韻得北字

惆悵杯酒間踟躕路側通  
別情所難況君遠行客行  
客適何許南交乃絕域  
山川阻且修匹馬獨登陟  
丈夫

四海志萬里猶咫尺  
苦辛諒不辭所思在明德俯視川  
從東仰睇星拱北還朝會有期側竚聽消息

薛瑄

擬古

白雲在高丘綠蘿在深谷中有冥棲士雲蘿蔽茅屋獨  
抱尚友情緬遂碩人軸古琴時復彈古書還更讀逍遙  
無外事俯仰長自足沮溺耕在野姜叟釣渭曲伊人豈  
無心恥銜荆山玉將須鳳來儀朝陽滿梧竹

庭樹微飄落涼氣始披拂却憶少年時泛舟湖湘曲秋  
風起波瀾寒霜下林麓日出江上楓霧隱楚岸竹蘭芷  
亦蕭條芰荷不秋馥靈均舊遊處騷思方滿目忽忽三  
十年涼意復相觸九歌有遺辭得意在雲谷

秋思

秋來何所思所思在遠道洞庭木葉霜楚澤芙蓉老欲  
濟懷方舟風波殊浩浩寄言雙白鶴爾來苦不早

登高望滄海長風歛來過九鰲互低昂三山鬱嵯峨綽

約衆仙子飄飄戲其阿手把珊瑚枝笑拂扶桑柯我欲  
往從之道遠百怪多安得騎鴻鵠乘風越洪波舉鞭逐  
蛟蜃仗劒驅黿鼉永與衆仙會遨遊養天和

泊舟貽溪宿陽樓山下

窈窕入清溪側逕何紆曲魚梁截奔流雪瀨激寒玉空  
翠濕人衣霧雨滿新竹路窮上野航前登得平陸日暮  
烟火迷似向桃源宿

瀟湘八景

平沙落雁

露清秋水落風過人跡平  
飛飛隨陽鳥相呼下寒汀  
向夕聚儔侶月映蘆花明

烟寺晚鐘

夕照下山門清音出煙霧  
暝壑一僧還側佇尋歸路  
月上楚天寬露落洞庭樹

瀟湘夜雨

兩岸叢篁濕一夕波浪生  
孤燈篷底宿江雨篷背鳴  
南

來北往客同聽不同情

江村暮雪

落落漁樵家蒼蒼起烟霧岸滑移釣舟平沙失歸路似  
有凌波人盈盈月中去

漁村落照

釣艇收晚緡歸鴉集疎柳天風吹彩霞明月映江口孤  
村一笛橫萬慮復何有

山市晴嵐

雨來萬壑昏雨霽千岫出晴旭楚人家蛾眉畫生綠看  
看如有情餘光遠相逐

洞庭秋月

西風淨晚烟天水遠相接瓊樓玉宇深炯炯涵虛白夜  
久風露寒一曲湘靈瑟

遠浦歸帆

翩翩投極浦漠漠背殘照水柵歌竹枝清風激幽調歸  
舟漸覺稀錯莫尚凝眺

湘江舟中

湛湛湘江綠夾岸叢篁多挽舟逆水上南風起微波嘉  
此晴霄景逍遙翫江沱沙渚曠緬邈雲岫紛嗟我遠目  
為舒暢客意將何如濯纓吾所愛聊為扣舷歌

遊君山寺

為愛湖中山遂尋山下路躋攀轉出邃澗谷亦回互石  
磴足莓苔青林雜烟霧前行如有窮嵐嶺乍分布招提  
壓重湖千里周一顧孤峯四無根形氣自依附山僧復

導我窈窕更徐步疎籬野蔓懸老圃寒泉注逕轉山房  
深重與絕境遇白雲簷外生清風竹間度庭花雜無名  
歲晏色猶故澄心得妙觀忘言契良晤愛此林壑清遂  
薄塵俗務重來待何時尚子畢嫁娶

洞庭遇雨

孤舟行何遲歲晚洞庭雨跳波亂明珠隨風颺細縷雲  
霧失君山波浪連吳楚莫唱斑竹枝別思滿南浦

秋日雜詠

庭樹生秋風微涼入衾枕久客得無思遠意復誰論道  
腴足充餐天和可當飲以茲撥離憂僻好安所稟大義  
自古來旋覆吾已審

翻翻高荷葉秋雨生微涼豈不懷遠道撫時坐空堂何  
以為我歡簡策多遺芳古人不可作古道不可忘茲理  
將無墜欲語墮渺茫安得忘言子相與傾一觴

宿信陽慈氏寺有懷趙侍御

禪室絕清灑夜景何寥寥白月墮簷隙涼颺拂林梢有

客不能寐起坐心焦勞所懷同心友相去一何遙開門  
望天宇露冷河漢高恨無雙羽翰奮飛共遊遨秉燭遂  
至旦詩成還獨謠

宿山亭

山深郵舍孤入門晚色晴四顧足喬林蕭蕭北風勁向  
夕起重霏窓戶修已暝燃松代秉燭明暗光靡定草草  
具杯酌何暇梨果飮乃知山林趣足發遠遊興天明登  
前山清風滿羅逕

褒斜道中

褒斜一何長深谷自迤邐雲木青無邊羣木各峻峙鳥  
道緣崖顛危棧架江渚冥冥叫子規泱泱響溪水累日  
山峽中陟降亦勞只自我入蜀門已逾一年矣既乏督  
辦能魚負素餐恥而況鬚髮蒼胡寧不知止上章乞解  
綬詔許感不已雖云此谷險且遂北歸喜

于謙

夏夜步月

明月入我戶清風吹我衣散步下瑤階仰看星斗暉萬  
籟寂不聞羣動感息機嘯歌振林藪鳥雀爭分飛興盡  
却歸來此意知者稀

夜聞鶴唳有感

齋居無四鄰庭空篆烟冷明月揚素輝修篁散疎影雙  
鶴向我鳴鼓翅復引領靈風振縞衣華露挹丹頂清響  
徹雲霄萬籟悉以屏芝田在何許遥遥隔塵境欲去還  
未能蹉跎駐光景聽此融心神令人發深省

南國有佳人

南國有佳人皎皎冰雪姿恒恐污潔白臙粉弗敢施奉  
身事君子服勤忘燕私一朝成遠別千里長相思願托  
雙飛翼辛苦良不辭飛來侍君側恩義兩無虧永言執  
箕帚盡瘁以為期可望不可即翹首空嗟咨

陳叔剛

松坂

亭亭萬松林別構僅容膝席陰無冬春簾翠自朝夕主

人受松風靜聽意自適清吟到夜分明月在中罽是非  
曠不聞烟霞已成癖我有小山謠期君謝閒逸黃鶴遊  
青冥汗漫不可即

偶桓

赴夷陵

迢迢上夷陵意促日易暝亂石剗馬蹄叢棘罨衣領登  
山若攀天度壑如赴井撫膺欲嘔心喘息屢延頸但逢  
過虎跡覓絕行人影顧茲客懷惡況乃道里永毫素難

具陳聊以述短咏

雜詩

衡茅日岑寂嘉樹生繁陰夙興挹朝爽翛然澄我心如  
彼倦飛鳥冀得棲故林抱經味遺言且復理鳴琴惜哉  
鍾子沒曠世誰知音

養疴卧丘樊庶得脫塵鞅三徑日就荒行樂倦還往荆  
榛既蕃蕪荼蓼亦滋長幽蘭獨憔悴況復纏草莽不因  
馨香發豈獲君子賞

早發灘江示同舟戴伯貞

夜泊南熏亭曉上白石潭北風颯以爽蕭蕭動征衫灘  
水激沙礫桂嶺浮煙嵐顧此道里修遥遥在天南常恐  
瘴癘惡三年情不堪今晨始得歸灑然脫塵凡況遇同  
袍友高歌酒初酣搔彼頭上雪短髮各盤髮相顧但一  
歎往事悉已諳林泉在何處為我洗餘慙

郭厘

懷鳴秋先生之京

澄江晚悠悠離思杳難極西風鴻雁飛我憶鳴秋客遠  
樹帶餘暉前川起寒色即此待歸舟沙頭掃苔石

施敬

送吳文學東還

結歡未云久詎盡平生語執手臨路隅離觴聊一舉殘  
鐘草堂夕落雁蘆洲雨相憶渺天涯深棕若為處

題梅得芳杏林圖

梅仙煉丹處山杏栽無數賣藥到人間衣裳帶紅霧花

開不知歲子落還成樹我欲與之言飄然騎虎去

李悌謙

擬古

驅車前送君送君長亭道落日照道周君行何草草結  
交既已晚相去一何早世路多險巇君身詎能保別時  
春草深于今已枯槁思君衣帶寬憶君容顏老

尤安禮

送人從軍

秋風正搖落遊子遽離羣結髮事戎行遠戍驃姚軍悠  
悠歲月邁渺渺川塗分何以慰心曲努力樹功勲

錢安

舟中遣懷

朝發浙江頭暮宿越城下寒月照船窓清霜肅原野豈  
不念別離吾道有用舍俛仰宇宙間孤懷浩難寫強取  
囊中琴起彈仍復罷悠悠世上人誰是知心者

劉績

題西陵送別圖送姚進士

悠悠復悠悠風吹江上舟  
今朝天色好送客西陵頭  
西陵在何許羃羃春郊樹  
搔首望行人迢迢上京路  
京路一千程官梅照眼明  
春風濃似酒難浣別離情  
別離餘幾日佇得君消息  
折取杏園花慰我長相憶  
相憶夢相仍高樓只自登  
春潮知我意日夜向西陵

鄭嘉

題陽關送別圖

漠漠楊柳花青青楊柳樹帶花折長條將送行人去灞  
陵勿淹留明日發沙洲沙洲連塞路望望使人愁願推  
雙車輪推過壽昌縣壽昌何蔚蔚邊城如眼見別曲歌  
且停春醪香更清一杯歌一曲曲盡兩含情含情豈無  
語別離心更苦懊恨別離多歡娛能幾許萬水復千山  
人去幾時還誰言功名好儂道不如閒

木芙蓉

綠岸芙蓉花花穠葉逾翠影落空潭秋新妝鏡中嬌朝

來白露濃  
臙脂墮紅淚

毛鉉

剡溪霽雪送原上人

積雪蔽招提  
虛室夜生白  
開門不見人  
烏棲山正寂  
疎星帶長汀  
澹月照幽壁  
遠樹看欲無  
近水聞更滴  
傍觀雲外峯  
忽見青蓮色  
此境足安禪  
何為迷所適

鄭關

暇日南湖莊上

門徑絕車塵惟聞沙鳥語誰識忘機人  
山間坐朝暮南風吹雨來颿爽溪頭樹  
白鷗知我閒相看不飛去

題秋江送別圖

美酒雙玉壺沙頭送行客  
瑟瑟荻花風寒江秋水白落  
日下長空返景明石壁去去入煙霞  
相思楚天隔

陳端

夏日遊龍山寺

永日厭馳驅于焉此遊息  
苔徑匝清溪松廊連峭壁  
經

聲出遠林泉響逗幽石長嘯倚茂松鐘殘景方夕

李孟璿

擬古

卞氏有美璞采之荆山中至寶不先剖獻君乃至公玉  
人何嫌猜三獻兩見刖抱之發長號淚盡繼以血宋人  
貴凡石得之梧臺東周客視之笑本與瓦甕同忠言翻  
見惡藏之愈深固自誇天下珍和璧安足覩嗟哉優與  
劣賤目豈能別

朱純

雜詩

浮雲起山澤  
靄靄敷重陰  
迴薄遍太虛  
膚寸即成霖  
飄風使之漓  
跡滅不可尋  
偉哉賢達士  
澤物固其心  
遭時為卷舒  
陸沈詎無因  
誰言擊磬聲  
不及南熏音

黎公弁

金疊山

青山天際來  
勢若雙飛蛾  
平明宿雨收  
嵐氣生林阿  
非

煙亦非霧炫日金碧多流鶯緩語處坐愛春風和

陳紹先

感興

豐城蝕利劍藍田沒良玉出處諒有時光芒豈終伏一  
拂即用世三獻徒自辱安知莘渭間養晦恒自足龍興  
雲亦從夢筮若秉燭經濟成大業誰復繼遐躅

荷篠丈人輩沮溺同其流潔身非良圖與世空沈浮禹  
稷抱大器孜孜為時憂手足俱胼胝驅馳行靡休水土

既平治稼穡云亦稠粒食惠萬載厥功孰與傳

沐璘

題所畫風雨漁舟圖

寒雲翳層空暝色生平楚商吹振林巒驚濤滿洲渚漁翁何處歸孤蓑立煙雨

陳顥

題歸去來辭畫

微風自東來地脉初回陽好鳥出幽谷潛魚躍芳塘欣

欣木向榮涓涓水流香萬物俱得時吾憂亦已忘歸來  
衡門下且復酣杯觴

人生非金石寓形宇宙間抱才既沾祿知休即辭官委  
心隨去留避俗謝往還遑遑欲何之富貴不可干劃然  
發長嘯白雲起南山

農事在東臯孤往適茲旦微雨亦既零土膏濕凝汗僅  
奴未盡力宿草猶餘蔓植杖隴畝旁耘耔日過旰勞生  
雖多艱卒歲應飽飯

帝鄉不可期歸老全此身清風謝流俗高節抗浮雲舒  
嘯登東臯賦詩臨澗濱有酒輒取醉不負頭上巾樂天  
以乘化超然真達人

張肯

題江雪川長江圖

洞庭淪三湘荆楚靄七澤奔流汎夕漲遐渚斂暝色飛  
帆雲外去旅雁烟中集狂飈激洪濤落景度赤壁憑高  
欲望舞歌些憐弔屈木落秋風清天低暮山碧待濟無

方舟徒令歎行役

題秀野軒

高軒臨秀野信是幽人居  
炎氣遠不到花竹自扶疎  
羣葩霽春芳喜蔭含夕虛  
境勝固云適況復有琴書  
諷詠佳遊外留連清賞餘  
應知獨樂意無復慕華裾

梁時

秀野軒詩

素秉丘壑姿勞生滯予往  
覽茲愜幽情遽爾成真賞  
林

霏藹孤墅春物組膏壤稍行樵徑遠忽展耕疇廣所以  
山水情遂結雲霞想挂冠苟有期終焉脫塵鞅

羅紘

題畫

入山採靈藥山深愁日短空林獨自行木客時為伴木  
肥晨露滋芝秀春泥暖荷鑱暮歸遲前溪白雲滿

趙友同

題趙子固蘭蕙圖

雜花已垂盡幽草何歲蕤風來一飄泛莖葉不自持賴  
有芳心在含香終未移

修葉亂紛敷幽花愛鮮澤雖非百畝繁孤馨自朝夕撫  
卷動遐思悠然長太息

蕭鎡

題山水圖

青山何岌嶸下有嘉樹林高亭畫間敞窓戶含層陰前  
村夜來雨石瀨張素琴好鳥鳴簷間始知春意深迴無

外物累嘿處抱冲襟對此案上書悠悠千載心安得謝  
塵羈扁舟諧遠尋

身已與世違超然景方寂嘉樹敷層陰芳苔間行跡飛  
淙如練懸斷崖若天闕亭亭山上雲齒齒溪中石豈無  
同心人高談共晨夕簷虛嵐濕衣窓迴風生席雅趣良  
足耽營營竟何益

樂隱為尹克俊賦

行愛溪中水坐愛溪上山富貴非所願悠然心自閒地

偏輪鞅稀蓬門晝常關清風天上來入我窓牖間豈無  
一尊酒可以銷憂顏葉落驚秋徂鳥啼知春還既忘是  
與非寧復虞險艱雅志固如此高踪安可攀

徐有貞

感寓

阿閣何巍巍高梁入穹蒼飛梯十二重宛在天中央上  
當北辰星下見列宿光清風流綺疏祥雲自飄揚我時  
臨其上分明望四方山河遙鬱盤宇宙何茫茫威鳳去

已遠羣鳶並翱翔  
緬懷軒轅氏徒倚  
徒彷徨

七月大火流西風  
涼撼撼熠燿飛荒  
除絡緯鳴虛壁白  
露下漙漙明星何  
歷歷起視知夜深  
斗柄當頭直披衣  
坐不寐俛仰興歎  
息駸駸歲云逝冉  
冉老將迫人生天  
地間還如逆旅客  
一過不留名徒生  
亦何益

劉經

鳳凰臺

崇臺消水濱昔有  
鳳凰集朝陽不復  
鳴荒基徒屹立漠

漠飛塵紅萋萋豐草碧鳳兮去不回使我空歎息

周旋

霜林晚節圖

朔風何蕭蕭嚴霜亦皓皓維此歲載陰羣芳盡枯槁懿  
彼松柏心堅貞長自保春風桃李花春雨靡蕪草紛紛  
競顏色第遲一時好

劉定之

義山

家居禾川滑義山日對面悵未得登臨此心徒健羨今  
春雪中來半塗足已倦顧視萬坡陀茫然莫可辨巖蘿  
冒飛靈林葉響急霰俛若赴井汲仰疑登塔旋奇觀豈  
神助寒苦亦吾願日暮抵山麓小溪亂石濺僕夫指龍  
湫時或出雷電信宿留山間陰晴已千變仁里固有鄰  
誅茅從所便嗟我四方人安得長眷戀

張和

送劉文羽入京

臨岐一杯酒為君歌遠遊人生如浮萍聚散焉能謀落  
日照大江長風吹行舟江花與江水離恨同悠悠

商輅

送鄭僉憲

南服苦凋瘵民物思來蘇明公早脫穎衣繡躡亨衢持  
節佐烏府秋月照冰壺清濁奮激揚仁恩益覃敷黎庶  
賴休養奸豪絕根株輶車一以到耆穉咸歡呼至今江  
浙間下吏無貪汙佇期膺峻擢同步丹墀趨云何遽行

邁離思紛鬱紆往矣慎勉旃功業詎能逾

蘭蕙圖

蘭以比君子蕙比士大夫人物雖云異氣味乃不殊托  
根深林下羞與桃李俱妖豔任紛紛貞姿恒自如共言  
王者香宜為禁苑居一朝移植後雨露恣濡芬芳異  
凡卉馥都盈天衢採擷足紉佩把玩堪怡娛發舒似遲  
晚蠲潔無終初誰將幽靜意寫此蘭蕙圖對之遂清賞  
塵慮焉能紆呼童出門巷止回俗士車

呂原

古風

天運無停機造物有消息雪見晁曰消日逢中乃吳飄  
風固須臾暴雨亦頃刻溝潦寧常盈江河無久溢枯楊  
華暫生朽壤茵虛植繁英易憔悴病葉早狼籍浮雲能  
幾時初月豈終夕細推皆自然達觀又奚惑慨彼聲利  
徒擾擾竟何益

薰猶不同歲冰炭不同器杓鑿每齟齬蘭艾常嫌忌燕

禽肯戀吳越馬匪思冀水投石難入矛遇盾弗利道異  
不相謀事殊不相為學古而居今落落與時背

木從繩則正薪受斧乃析輕重平以衡長短度于尺規  
矩制方圓繩墨司曲直浣布須賴灰攻玉必資石金就  
礪方利火被水斯熄凡物有相制用之在人識

泮林集飛鶚食菴懷好音惡人謹齋沐承祀亦居歆瓦  
石變和玉鉛鐵成南金化惡以為美君子當存心

懷人寘頃筐卷耳采不盈爵祿靡入心飯牛有肥牲左

規右執矩方員豈並成目明非兩視耳聰非兩聽心專  
使二用智者亦鮮能

劉昌

春眺

端居秉高志道與黃綺謀耿耿千歲懷安能一朝酬青  
陽肇嘉節義馭逝不留樹木發華滋綠葉揚芳柔上有  
鳴春鳥嚶嚶求匹儔踟躕不能寐攬衣起行遊況復有  
良朋分若金石投攜手出西郭眷言山水幽祓除激清

波眺遠陟高丘西北臨廣路巍巍列飛樓誰人為燕會  
交親結綢繆光景忽西馳娛樂殊未休豈不念合并欲  
邁路阻修顧望勿復道回身駕輕舟折彼蕙蘭花聊以  
忘我憂

陳憲章

漫題

日月逝不處奄忽幾華顛華顛亦奚為所希在寡愆韋  
編絕周易錦囊韜虞絃飢餐玉臺霞渴飲滄溟淵所以

慰我情無非畹與田

二孫名

提攜衆雛上帝笑高堂前此

事如不樂他尚何樂焉東園集芋本西嶺燒松煙疾書  
澄心胸散滿天地間聊以悅俄頃焉知身後年

有懷世鄉

仙鶴去不歸黃鸝向人語空館忽相思雲山杳何許出  
門望東海默默空延佇月出潮復來鳴撓下滄渚  
伏枕廬山下春懷慘不舒哀絃久去耳風韻今何如灼  
灼花自媚嚶嚶鳥相娛高臺夕流盼古道行人疎

送劉方伯東山先生

未別情何如已別情尤邈豈無尺素書遠寄天一角江  
門卧烟艇酒醒蓑衣薄明月照古松清風灑孤鶴

贈陳秉常

遠色霽初景清風振遥林子來入我室弄我花間琴正  
聲一何長幽思亦已深願留一千歲贈子瑤池音

拉馬玄真看山

官府治簿書倥傯多苦辛文士弄筆硯著述勞心神而

金  
卷二十一  
我獨無事隱几忘昏晨南山轉蒼翠可望亦可親歲暮  
如勿往枉是最閒人近來飲酒者惟我與子真能移柳  
間舫同泛江門津

紫菊吟寄林時嘉

嚴霜百卉枯三徑挺秋菊綠葉明紫英微風遞寒馥懷  
哉種花人杳在江一曲遺我盎中金南窓伴幽獨時無  
續騷手憔悴誰當錄且脫頭上巾茅柴今可漉

築室

辛勤結吾廬經始算一一廣狹更度量卑高在平秩堂  
以備薦享閣以邀風日前樹貞節門後治渭川室四垣  
謝粉飾牡蠣高為骨仰瞻勢微峻其間僅容膝既以儲  
簡編猶堪斂袍笏是年秋在仲筵日欣得吉良友交助  
余衆工告易畢把酒對梅花浩歌新突兀

贈周文都

十年兩別君一別一回老問藥朱陵遊吾茲恨不早平  
生憂樂心相對各傾倒遠別望眼昏浮雲不堪掃

郭登

題蔣廷暉小景

我家南山中柴門別經久不知今春來新添幾株柳清  
江間釣竹鷗鷺還來否對此忽相思長歌獨搔首

楊翥

黃岡阻雪

積雨既淫溢飛雪何漫漫經旬苦不止行子多悲酸悲  
酸亦何事匪為飢與寒倚門累晨暮定省違承顏欲行

阻泥塗欲濟愁驚湍凍水號江介飢烏噪林端向風長  
太息恨不生羽翰出門不自遂誠哉行路難

秋懷

肅肅涼吹發唧唧寒蛩吟春夏不自豫況乃秋氣臨時  
序忽流邁感此百憂尋人生誠須臾華髮易為侵立名  
亦素志為善實所欽塵事日紛擾進修力不任愁懷難  
自遣徒倚高梧陰

御選明詩卷二十一

欽定四庫全書薈要卷一萬八千五百二十二

集部

御選明詩卷二十二

五言古詩七

童軒

擬古

有園莫種桃有地須種竹桃樹搖春風嫣然媚紅綠豈  
無一時好終隨車馬足何如青竹枝歲晚在幽谷節直  
心亦虛冰霜立寒玉

和韋蘇州寄全椒山中道士

兀坐郡齋裏，遠憶黃冠客。  
洞口採芝歸，羣羊卧白石。  
風吟落葉秋，雨翳殘鐘夕。  
攜酒欲相尋，山深斷行跡。

和柳柳州贈江華長老

丈室團菁茅，禪心湛虛寂。  
去歲舂陵來，蕭然寄高迹。  
貝葉坐翻經，篝燈寒照壁。  
萬慮澹無營，一盂飯昏夕。  
松關疎雨鳴，竹塢幽泉滴。  
入定起來遲，曇花滿身積。

池上夜坐

池上微雨收涼月吐空谷蕭蕭敗垣柳疎影覆我屋草  
深蛤爭鳴荷折鷺驚宿偶此遂閒情居然忘寵辱

王越

中秋對月用孟浩然韻

明月下空庭清光寒不濕褰簾坐來久忽見飛螢入空  
懷寂無聊何處砧聲急對酒不成吟起向西風立

榆陵送武靖侯趙公還京

古人一日別常懷千里思況在天之涯而與君相離風

寒歲云暮夜永雞鳴遲悠悠行路難苦樂心自知人生  
如浮雲聚散安可期君歸日以遠我歸當何時豈不念  
鄉國顧此王事縻霜月滿孤城照見遊子悲

金雀花

侯門愛金雀金雀顏色好化作枝上花凌春獨開早冶  
遊亭館多芳容等閒老東風一飄零不及澗邊草

李應楨

東禪寺

松杉滿院風瓜豆一籬綠不聞車馬過時得高人宿日  
暮還獨歸悵望城東曲

何喬新

秋懷

驚飈撼庭樹秋風慘悲涼玄鳥已遠逝羣鴻亦南翔幽  
人抱遐思攬衣起徬徨念昔少壯日志輕杜與房淹留  
竟何成鬢髮倏已蒼平津為漢輔汲生老淮陽感彼積  
薪歎悽然使心傷

丘濬

擬古

依依重依依不忍生別離別離已可悲況值秋風時柳  
衰不堪折情苦不堪說願妾為小星君身化明月明月  
貼天飛小星恒相隨月出星隨出月歸星亦歸莫學秋  
胡妻相逢不相識生者固可慙死者亦何益

送廣東夏廉憲

當宁念遠氓塗炭日以極詔簡在廷臣往司風紀職僉

曰御史某秉德剛且直屬耳按左右風聲甚輝赫兵政  
既以舉吏弊亦以革謠言聞遠近公論推第一無如斯  
人可拜手荅明勅天子曰俞哉超授三品秩天語重丁  
寧綸命光鳥奕百僚無間言相見咸喑喑而我嶺南人  
慶幸倍千百預為鄉人喜從此得蘇息特恩許乘傳陞  
辭行有日走也官禁近早有半面識中心久有懷臨分  
忍緘默聊為陳本末幸與垂采擇惟茲東廣地富麗自  
古昔秦初已內附漢後亦廣斥東西數千里十郡六十

邑衛所錯其間小大五十七憶昔全盛時承平久寧謐

家家有蓋歲人人各安適土著少流徙世業足資給士  
族尚詩禮農家務耕織先期輸賦稅俛首供力役民不  
受箠楚兵不識鋒鏑行旅不齎糧遠出不待吉昏夜絕  
剽竊歟歲無行乞況復天氣暄地利多所獲三冬著苧  
衣五月收新植山舍少汙萊水田自潮汐舟遊泛滄茫  
火種燒劣崩曉包趁墟飯晴著登山屐海錯富蚌蜆家  
烹剩豚鮓文木生山林珍貨來蕃舶荔奴然大樹橘柚

垂金實閭右食素封田圃盛嘉植愛身寧破產終訟羞

曲筆遐邇總安恬公私舉豐殖逮及廿年來長吏恣胸

臆厚利動其中甘言誘其側欺彼民柔愚藐茲地遐僻

遂決禮義防大肆搏噬力把臂褫其衣挾口奪之食溪

壑填不滿氣燄撲難熄上下相師承前後遞沿襲豈云

無鷹鷂方自為蟲螭天門遠萬里無地訴冤抑致令仁

厚性化作克險質弄兵潢池中延息苟旦夕外邪尋即

除中虛遂成疾蠹茲洞口徭窺伺乘間隙始惟掠近地

稍稍出復匿迹彼素脆悞頓異戎與貊制伏本非艱而  
我狃安逸武胄恥言兵文吏諱申賊縱虎出林薄延鬼  
入居宅路有橫草虞關無一夫搤長驅捲村落乘夜盜  
城壁豈彼智有餘乃我法不立歲歲轉猖披邊境遭轡  
轢脅從日漸多兇徒日增益居民就流散人烟渺蕭瑟  
已身不自卹何暇問家室田蕪乏犢耕井渫無人汲萬  
家春草青一望秋原赤禾麻種殆絕雞犬聲亦寂昏雨  
燐火青涼月死骨白內地幸苟免因之困供億相扇咸

弗靖濡沫聊戢戢方今堯舜朝大臣總臯稷萬國俱時  
雍一方獨艱扼九重赫然怒遣將擣其窟天道信好還  
王師本無敵鼎魚姑假喘穴蟻難藏迹行當見埽平腥  
穢永蕩滌却愁火然岡罔辨玉與石嗟爾嶺徼人罹此  
殊可惜賈父來每晚謝令去不亟由来非一朝往者何  
嗟及幸茲天日開光景方昭熠草木回生意山川增秀  
色福星離紫垣甘雨隨丹軼指日下滇江持節鎮南國  
先聲一以聞父老歡以泣迎拜古道傍應以手加額願

言明使君代天布仁德為我招殘魂為我肉枯骼為我  
作保障為我剪荆棘為我開喉吻為我插羽翼醫我眼  
前瘡除我腹中匿我寒衣以裹我飢食以粒生者受我  
廛死者與我柩一夫或失所孰非使君責使君今已行  
行行去須急齊民正倒懸異類尚反仄如病望醫師如  
早望雨澤寄聲報吾人此公古難得瘴海行將清貪泉  
不能惑佇看凋弊區復作全盛域

## 古意

千金買寶刀百金買角觿寶刀頭有環角觿能解絲慙  
勤寄遠人用以慰所思所思不見察幽獨甘自怡

劉溥

雜詩

仲秋涼氣肅白露下庭柯芳蘭委輕颺桂樹行復華  
仰時節至生意迭以嘉理運本自然無為徒咨嗟人生  
貴有道富貴安足誇膏火一朝盡撫膺其奈何

蘇平

雜詩

彼美南國姝婉孌貞且良丹霞製為珮明月懸為璫白  
玉蓄光采幽蘭含芬芳見者咸歎息不殊古姬姜世無  
蹇脩氏玉帛誰為將默默處重闌何曾下中堂容顏豈  
不好攬鏡徒悲傷但恐芙蓉花零落隨秋霜

寄金粟王公子

中夜百憂集攬衣起徬徨明月揚素輝列宿互低昂耿  
耿河漢流肅肅鴻雁翔念我同心人渺渺天一方昔為

雙遊魚今為孤飛凰援琴不成曲展轉憂思長豈無蕙  
蘭花為君掇其芳道遠莫致之中懷徒自傷

蔣主孝

遊牛首山敘志

夙昔抱奇氣遨遊山水中山水豈不佳心懷自忡忡于  
今老將至遨遊興無窮青天倚絕壁白石懸孤桐時乘  
小紅車朝西暮復東登登牛頭嶺浮雲繞蒼空楊柳落  
晴雪桃李吹春風斜陽下烏道野雉巖蒿蓬偶逢碧眼

僧呼我贅世翁叩之不復語矯首看歸鴻

徐章

貧居

薄田日已荒舊業日已替困蒙三十年良由寡生計人  
非無交遊貧賤易相棄周周與蛩蛩飢渴尚相濟所以  
簞瓢人傲焉不狎世處之苟能安其樂有真意

賀甫

古詩

焦桐古製作乃是爨下材金徽粲星斗玉軫調風雷寶  
之不欲彈撫視日幾迴囊韜藉文錦有待知音來

沈遇

秋夜宿東白啓師方丈

竹梧滿秋庭蕭蕭涼氣早孤燈照跣趺高僧坐來曉風  
清鶴夢醒雲淡鐘聲杳塵事永相忘心空衆緣了

彭韶

經進鹽圖詩八首

錄四首

草蕩圖

海墻咫尺地一望如掌平材木不生植草莽徒敷榮廣  
牧良有害泛取亦難成瓜分給亭戶表蕝自經營繁霜  
一以降百物俱彫零芻蕘忽萃止芟縛無留行輦運積  
官所來歲事煎烹負荷非為苦願言公課登

淋瀝圖

旭日朝沮場欣茲風色競錢鏹密如鱗沙塗平似鏡汲  
曬足灰泥層層白相映易地聚成堆再淋鹹始盛方池

藉以茅小竇暗通阱蓮實重且堅浮浮力能勝祇恐山  
雨來一簣功未竟殷勤守餘漚坐待涵池定

煎鹽圖

醎液泛清泠牢盆戒脩潔分番忽後時及此旺煎月一  
勺盡傾瀉萬竈俱焚爇沈沈紅霧收威威晴波竭斂之  
白盈箕凝華粲如雪點檢入公私中心更煩熱荆妻慰  
苦顏摩挲汗流血却歎戍邊人垂老有離別

放鹽圖

全  
卷二十一  
三邊乏儲峙良賈勞委輸償以權海利子母多贏餘水  
膏易消耗部屋難貯諸多年積逋欠折筭盡錙銖渺渺  
太湖畔盈盈東海隅雪山壓巨浪風帆恣所如每資藜  
藿食亦薦王侯厨誰念味中苦搔首空躊躇

秦夔

東安道中

南人喜乘舟鞍馬非所便自我離京師陸行苦迢遞長  
驅竟終日黃塵暗幽燕平原莽千里四顧無人煙況茲

冬欲暮寒風正淒然霜嚴裂肌膚指直不得拳僕夫亟  
告勞長跪向我前下馬語僕夫窮途須勉旃丈夫豈兒  
女壯志恒在邊微勞詎足惜去矣行策鞭

李東陽

夜過邵伯湖

蒼蒼霧連空冉冉月墮水飄颻雙鬢風恍惚無定止輕  
帆不用櫂驚浪長在耳江湖日浩蕩行役方未已羈棲  
正愁絕況乃中夜起

藤蓑次陳公甫韻

采藤復采藤日夕費斤斧製為身上蓑人古衣亦古借  
問製者誰白沙乃蓑祖冉冉綠蓑衣蕭蕭白沙渚披蓑  
向江水顧影還獨語愛此勿輕捐春江正多雨

玉堂下直

岸幘斜陽下疎林開遠山新涼灑衣袂爽氣清容顏林  
端見初月素彩生雲間褰裳步花影欲動愁闌珊向來  
竹林遊暫到已復還寧知一畝內迴若離市闌浮生且

為樂及此一日間

送楊參議分得紅字露字驛字三首

白露下將夕天宇生涼風之子有所適告别何匆匆羣  
公盡祖送飛蓋凌長空傳驂灤水曲列宴歷亭中秋容  
澹觴酌高風急絲桐酒盡儼將發班馬何玲瓏行當釋  
塵鞅還應挂飛蓬大江轉吳楚重山入蠶叢錦城有嘉  
色浣溪有遺踪訪古遂舒嘯觀風足從容坐令全蜀俗  
解與鄒魯同

金  
卷二  
林木生涼颼皋蘭被清露念子三川行正直九秋暮天  
空一雁翔江遠孤舟驚旬宣有佳興載詠甘棠句  
岷江瀉東溟岷山倚西極江山古名秀楊君將此適秋  
風送征帆夜火明水驛相憶瑤華音看取東飛翼

高郵冰泮發舟

晚泊高郵城雨雪竟連日念彼役人勞寓此孟城驛扁  
舟候晴發河水復鱗積因之累宿留令我心悵悵忽報  
寒沍解喜泛春流碧直過大江東北地成追憶

出金陵

金陵宿雨霽杲杲秋日明繆承北闕召促裝出西城追  
隨冠蓋集酌別臨江亭徘徊不能別去住難為情挂席  
曉風發解纜早潮生抗手謝送者令人意難平所願各  
努力令德崇端貞

送錢先生致仕

得臆字

成化己亥冬公來自南國維時龍興節奉表宸旒側入  
朝未浹辰具疏寫衷臆臣年七十二鬚髮不復黑乞身

謝圭組歸老東南域願為南極星中夜常拱北時當太  
平世聖壽千萬億臣雖在畎畝永荷陛下德聖皇眷耆  
舊曰汝予輔翊古稱老成人豈獨賴膺力吾當獎休退  
卿意誠惓惓加官號冢宰名位班九棘貤封及三世茲  
典尤絕特公章再入省請解尚書職臣方避華要而敢  
蒙顯陟王言重丁寧公意增感刻願書歸榮字堂扁揭  
華織江山佳麗地從此生顏色再拜送公歸臨風遠相  
憶

困暑次韻白洲

高堂遞晴陰炎熇氣呼闌燭同洪爐然溽入厚地黯繁  
星夜方搖淫雨晝仍濫炎光石成焦暝色山帶靨義輪  
燄赫赫雷轂聲轆轤龜坼行在田濤翻坐平檻占風想  
乾鵲吠日驚蜀獠彼浴空羨鳧吾冠不如蠶甘泉冷將  
濯惡木繁可斬快心甘獨勞炙手竟誰犯周扇懷仁風  
陶窓仰清範雖無薄書煩頗覺餐食減顰為窮兒愁怒  
作壯士喊亦有歲寒交緇袍義思范豈無雪夜訪杯酒

情憶湛天時手中環世事波上艦晚尋東籬菊秋種南山  
蘊思君正執熱有袂不可摻

習隱

咿啞復咿啞隔牆聞水車車翻水汨汨如在東鄰家當  
軒理嘉樹傍檻移新花一澆潤枯槁再濯無塵沙濟川  
恐無用學圃良非差房山有南畝海子餘西涯安得謝  
簪纓悠悠送年華

暑雨忽新霽曾軒開碧山浮雲避素月夜色明松關流

螢遞隱見宛在深林間埽石坐彈絲天風下鳴環瓊樓  
正在望佇立難為攀

答陸鼎儀誨言

少年被纓冠側身羣賢後狂悖寡自持多言衆所咎繁  
辭劇無益欲制已出口有時雜談諧觸冒遭詆詬雖言  
不為虐于德實云疚三復白圭篇令人重顏厚愧無請  
益辭負我直諒友陸君多雅懷指我以瑕垢翻然為起  
敬竦立斂雙肘退之喜嘲狎藉諫終不受才高使之然

嗟我實未有書紳古人戒敢不佩左右感子期重陳終  
焉媿瓊玖

贈彭民望

我家水西涯性本愛幽僻與君重攜手興至忘所適溪  
行緣縈紆野酌散愁寂倦來倚樹坐舉目見山色山色  
忽已改離別復幾載移居在城南咫尺隔江海夜來春  
風至芳意思共採道逢舊鄰人茅堂復何在

畫禽

濯濯隴山鳥雕籠雙翠襟欲以懷春意報此主人心哀  
哉寡儔和寂寂飲孤音

鸛鵒爾何煩形巧不及舌吾方怪其煩有喙莫敢說雖  
雖在何樹此鳥衆所悅

送徐用和之鎮原

惻惻重惻惻與君各南北昔作同心人今為遠行客燕  
山望秦關道路脩且棘平生舊驄馬十步九歌側長風  
吹征衣黯淡塵土色莽莽天地間胡為此行役功名豈

不念所志在憂國此意良獨知多言竟奚益

采桑玉堂陰二首答篁墩學士

采桑玉堂陰分蠶長安郭一勞累百牧再分連數箔寧  
知富貴地此物能沃若平生畎畝憂黽勉懷力作嗟彼  
衣錦兒空言養蠶樂吳機咏濯濯周葉歌莫莫遺我通  
家人同心故相託愛之敢輕棄弱女方就學

采桑玉堂陰陰濃樹婆娑一采不滿筐竟日能幾何乃  
知富貴地不及窮山阿蠶成忽滿眼所得良亦多人言

繫家運或者陰陽和向非夙夜勤豈恃葉與柯衣多必  
思寒吾民本同科欲將分蠶意廣被無偏頗

馬愈

太湖

太湖何茫茫一望渺無極但見青蓮花嵯峨水中立仙  
人雙髻了弄影鏡光碧皎皎山月高船頭幾聲笛

晝畫溪

溪藤蕩微風溪水清見底照映青藤花搖搖不能已仙

人紫綺裘嘯咏溪光裏  
慨彼塵俗心誰能此涓洗

張公洞

懸岸瀉紅泉石洞挂鍾乳  
仙房碧玉梯清涼了無暑  
仙人洞口呼相隨看花去  
欲往還自迷雲深不知處

玉女潭

潭花散清香潭影照眉宇  
不見玉女容騎鸞杳何去  
丹光罷青紅石屋亦輕舉  
惟有菰蒲根年年自春雨

吳與弼

與鍾生同宿東坡

日落辭蓮塘東坡到已暝煙霧村徑微燈花茅齋靜細  
語夜卧遲月華發清興黃卷試一開琅然共歌咏

山居

偶坐柴門下得與衆山友雨後已芳潤雲開更奇秀淡  
然忘我形不覺沈吟久却憶平昔居于茲幾翹首

東窓誦陶詩

時和風雨調綠疇日滋長吾意良淡然晴窓坐虛敞竹

卷二十一  
蔭連琴書幽苔隔塵鞅流誦徵君辭伊誰嗣清響

贈王徵士

卧疴白雲中苦心正懷舊忽枉故人盼青山得攜手晴  
窓坐南薰薄言勸春酒眷言惜離羣問荅殊未久荒村  
多寂寥還能重來否

遊黃嵐坑

微雨霽芳原散步春溪曲歡呼及童豎策馬驅黃犢入  
崦竹脩脩面岡杉簇簇展我懷中書坐向林間讀不有

巢許心那知箕顓躅但得風日佳朝朝來此牧

牧轉岡

寒裳陟崔嵬沈吟不知去塵襟一蕭散逸興迷雲樹梅  
殘誰氏花麥漲朝來雨鄰牧左右來往事更相語預期  
明日晴重作青山侶

登連珠峯

閣中罷鳴琴芳筵謝斟酌捫蘿一寒裳竒峯酬素約天  
風起蕭條山雨來溟漠時馳千里目四際雲煙薄會當

結斯亭勝覽翔寥廓

羅頎

雜詩

鳳凰遊北極金風襲郊局衆穢俱零落芳草亦不生徘徊幽巖中但見松枝青托根未得所歎息此孤英  
鳳雛不能翔鴻鵠自高舉遺身中林間羞與衆鳥侶羽翼諒未成不復思故宇惜哉無知音鶯鶯難與語

丘吉

擬古

青青澗畔松綿綿谷中蘿悠悠遠道人珊珊雙玉珂道  
遠有返轍川逝無迴波遊魚懷清淵逸鳥思高柯昔慕  
蕭與羸今作羲與和白駒不可駐朱顏尤易磨皎皎合  
歡扇文采駕鸞羅隨君願終老其奈秋風何

朱存理

支硎山再餞文交木太守

崇嶺達深邃芳漪激寒泉言尋支公蹤閱歷成千年鶴

飛遠青冥有亭尚歸然草木屬孟夏山水尤清妍祖餞  
此云再廣林啟長筵

朱凱

茅山人皆不飲泉水悉下汲于注壑又不善  
蓄佳茗住茲三日清苦之味頗未沾唇既歸作  
三十韻以自解兼呈社中諸友

情閒好品茶性淡能辨水江左幾泓泉勺勺定嫌美浙  
右園培栽種種別妙理七寶白雲淳

吾郡西山二水皆  
乳泉七寶差勝

石井劒池泚

虎丘二水皆積坎石井尤勝舊稱陸羽泉品為天下第三水今為庸僧所汙濁夏

乎惠麓流名下無虛士金沙與於潛

二水金沙在湖之顧渚在昔造貢茶

用之造畢水亦同貢於潛在常之陽羨

實難為娣姒

金沙最勝

顧陽針芒如渚

顧

陽羨異境同脉沈存中論茶以土肥樹茂一發而長寸許如針芒者是為上材

他山麥顆比土瘠

樹老不能條暢故短如麥顆是為下材

斫射聯吉祥

二焙顧渚傍產

碧葉光疑疑

唐貢接真珠

二焙陽羨傍產

綠叢秀蕊蕊串膏浪有名

串茶舍膏茶唐

人甚珍之此法已廢

生膏久亡矣

唐貢細搗生膏茶入銀瓶中從急程遞貢

當時境會

亭

白樂天有聞賈常州崔湖州茶山境會宴詩云青蛾遞舞俱爭妙紫笋烹嘗各闕新

今也生荆

杞對景訪遺蹤嶮峻屢曾履事須身所親趣在工夫裏  
正法陸生經傍參諸野史竹爐與茗筐相隨無遠邇窮  
源汲水清篝火烹旗紫應手傾入壺蠓眼若浮蟻甘腴  
勝醍醐芳香奪蘭芷杯面鋪白花盞底絕纖滓醉目閉  
即舒倦體卧還起詩腑常焦枯七碗猶未已同好唯兩  
僧合志只三子爭新與鬪奇各盡胸中技遂結夙世緣  
任彼老饕嘗尋真到華陽豈以口腹恃款食頗精豐供  
飲何率爾漫呼出廚間熟湯差可擬噤呻潤渴喉敢將

唇大哆吾社適聞之笑我應見齒明年再往茲裏茗置  
行李

劉泰

冬日曉望

寒風薄絮衣落木紛騷屑江紅有斷霞山碧無留雪隔  
水一聲雞悠悠送殘月

題畫

千峯落日陰閃閃鴉飛盡隔樹暗鳴泉蒼茫路難認何

處遠歸樵山花紅插鬢

顧寧

入山雜言

杖藜入山中悠然憺忘歸白雲靄前途行行穿翠微林  
幽鳥聲寂地僻人跡稀惟時歲云暮黃葉紛以飛石罅  
寒泉鳴草根朝露晞撫景自怡悅暫忘塵世機石壁挂  
我巾松風吹我衣將期二三子于焉歌采薇

桑悅

感懷詩有序

予自薄宦以至歸山其間幾三十年凡有所見及  
有感觸皆形于言共成古詩若干篇立意頗深寄  
興頗遠苟經平子復遇子雲不求牝牡之間索之  
酸醎之外則有得矣

嶺峻波深深世路多險巇推山塞溟渤大地無成虧濶  
步任所適萬里皆平夷古道本如此夜夢隨軒義

盎盎臨春閣盈盈珠翠妝桃李滿庭除東風有餘香更

衣間羅綺撫琵琶雜宮商艷陽好天氣歡樂殊未央一朝  
秋節換淒雨生洞房緬懷素心人風波隔瀟湘磨磚作  
明鏡黯淡無晶光照鬢向清水玄雲忽成霜蘭枯蕙亦  
槁芳菲轉萎黃誰為禦寒計當春獨悲傷

織女望牽牛銀漢一水遥天緣許會合秋清正良宵張  
騫取星槎吳質伐桂橈安用人間鵲腥羽編成橋

飛泉出高壑得地散漫流默循河漢矩到海方盡頭大  
人無繩矩出處心休休億變不同揆曲折與道謀正如

陰陽化坻參不自由時至自生殺何意為春秋請看一  
隅士蓄水如泥溝

我性亦愛水滔滔流古今生物稟津液潤地功澤深渚  
之深潭中養龍解成霖靜定謝流動終具朝宗心

劍氣衝斗牛茂先能暗識如何迷大權不見台星坼人  
事既宕冥天象焉昭晰我既乏世用撫撫安卑職天高  
無厚風卑棲羽翰戢平生經世念直與日月息他時明  
經中幸免書隱逸

嶰谷有奇竹能中虞廷管九奏鬼神格陽舒寒谷暖新  
裁作長笛杳渺傳新聲曲終風不吹秋色滿空庭  
長風合灘水浩浩同一聲餘音入松竹又作竽籟鳴文  
章同元氣隨物能賦形變化莫可測劉累難持衡

淒淒重淒淒棘路馳輪蹄高樓爍千仞雕簷與雲齊夫  
君獨高據有路難攀躋飲淚與君別留淚背後啼金烏  
刷炎羽朝東暮奄西一語不得語相思徒爾為

東園有奇花容姿鮮灼灼雖是春風開亦是春風落甘

霖被郊原蔓草輕  
蘭葯所以高岡松  
無言樹寥廓

久雨春寒殊甚杜門不出觸景興懷和文公月

夜述懷韻

陰雨壓春意坐怯衣裳單  
騷經舊香草想綠沅湘間  
雲深翠鳳杳天濶蒼虬寒  
軒輶幾時駕長往遊君山

遊仙

月朔衣文繡長夜遊禁苑  
列宿吐微鉉乘昏造虛館  
瓊樓足清寒欲進更蹇蹇  
聞說九霄上皓魄四時滿  
黃文

邀我遊蘭路肅吹管何愁失照灼弦望諒不遠時去莫  
我留更盡更展轉

同丁秋官鳳儀夜坐

哦詩北斗下清夜殊未央長天唳孤影一雁東南翔我  
心如風露夏夜亦清涼况對秋月坐肌骨沁寒光

程敏政

題尹性之御史所藏周文靖竹

周郎識此君落筆琅玕長居然步湘皋翠袖忽兩兩相

將舞回鸞勢欲凌波往平泉與危石轉折助清響坐令  
俗耳淨遽覺煩襟爽亭亭吉甫孫霜臺絕塵鞅晏歲凜  
相盟虛心愜終賞

晚香為太倉陸處士作

篤行老不衰有美陸仲父平生得高趣卓爾在秋圃羣  
芳坐銷歇黃花正紛吐凜如千歲夫歲晚節逾苦窅窅  
林亭間相對傲風雨慷慨陶徵君遺跡未榛莽亦有韓  
相國功名炤千古出處雖不同景行吾所取湯湯末流

中誰能立孤柱千里聞德馨相思動吟塵

莊景

養菴為永興馬貞夫元題

北嶽霜雪幹玉漢強千尋南溟珊瑚枝元宮極幽深  
誰見毫末積效踰山岑撫卷得玩頤隱几亦觀心辭琢  
豈白玉受厲須黃金無寐月自生無覺日自沈回首人  
間世坐驚復行吟枵然舍予琴誰哉賞此音

張弼

紅梅贈翁僉事

庾嶺小紅梅風標天下絕昨日幸同歡今日傷離別玉  
筵兩三聲吹落臙脂雪寫以贈知心相攜共明月

咏竹

擊節歌離騷湘靈招不得開門看明月幽篁倚蒼石春  
風千萬花花落春無跡此君冷淡姿常有好顏色

李傑

早行舟中有作

荒雞一再號東方漸生白衆星尚駢羅天宇黯以黑晨  
光正蒙昧莫辨河山色舟行趁潮長寧費牽挽力蘆汀  
雁驚起鳴聲何嗶嗶輕颺拂涯樹涼露時一滴前村燈  
火明茅屋疎林隔蓬窓攬衣坐悠然忘盥櫛宵征自可  
怡此景更奇特

登泰山絕頂

五嶽鎮坤維其東雄泰岱巖巖一何高屹立霄漢外神  
靈所攸鍾秩祀宜萬代我來屬深秋登陟覽勝槩雲開

旭日升峯巒新染黛盤盤上澗谷石磴豁復隘涼颺起  
虛谷颯颯響靈籟兩崖戢霜樹爛斑殊可愛五松非秦  
封亦已類偃蓋躋攀入天門縹緲凌上界睇盼感廢興  
喟然發長嘅七十二帝王封禪遺跡在玉檢時復出厓  
礪亦殘壞茲山自今古直與穹壤配絕頂氣益清衣袂  
浮沆瀣羣山紛後從歷歷同聚塊中原小如甌滄海縈  
若帶置身九重近誰謂天下大吾言良非誇聊以志一  
快

泰山竹林寺與陳大叅楊僉憲同遊

陟險千萬盤未識寺門處一澗委蛇來齒齒亂石聚飛  
梁忽橫亘清泉下奔注其間有靈湫蛟龍所蟠據時經  
不測溪心動髮毛豎肩輿尺寸進僕夫汗如雨我欲飛  
步登厓傾足難駐青鞋與布襪惜不攜此具貪竒不知  
止竟忘垂堂慮緬懷得一樂未足償千懼峯回見林薄  
飄然發佳趣古殿三兩楹滿庭蔭高樹百果經秋霜甘  
美皆可茹同行得二妙把酒勸酬屢酒酣陟嶺巔冀與

仙靈遇高寒覺衣單  
俛視飛鳥去白雲出巖阿  
英英若春絮登臨興無限  
日暮歸何遽摹寫詎能窮  
率爾成短句

秋崖

秋山鬱岌堯懸屋削如壁  
自非插羽翰可望不可即  
若人何好奇捫蘿每登陟  
濕雲潤我衣落葉墮我帟  
逍遙空青外似與塵世隔  
便欲御冷風飛行覽八極

陸容

夜聲

微醺醒中夜獨寤當逆旅心清聽思聰聲動臆可舉輕  
噫疑林颺斜侵覺窓雨琤琮僧塔鈴幽軋鄰家杼杵擊  
喧邏兒剪擲鏗縫女隆隆暝行車橐橐宿春杵鼾睡人  
已酣嬌啼兒欲乳悲酸或孤嫠咳咯將病嫗布裂僮褸  
衾釜泣奴竊煮梁泥落棲燕橐果嚙飢鼠拂樹烏驚移  
含芻馬歎咀火煎蘭藥膏槽涓玉缸醕腹朽雷殷春耳  
眩蟬吟暑宮壺沈此時巫鼓來何許趨朝傳鳴騶話舊

接偶語百蟲薨然飛靈雞振其羽衆音等天籟真韻謝  
律呂賦愧擬歐陽聊以詩自叙

樊阜

田家雜咏

嘉樹蔭衡門鳴鳩徧村墅薄言農務興力作無男女晨  
爨煙未起驅牛理田圃茲時若宴嬉爭得好禾黍清曉  
聞雨過春流漲溪渚小兒學把犁小女亦能杵生理勿  
嫌微浮榮非我取

少長郊墟中縣官名未識長時帶好容不見惡顏色高  
隴麥穗齊雉鳴自歲翼野田耕耨餘工力暫時息日夕  
會鄰家黃牛卧籬側酒酣勉諸孫耕作當努力微雨過  
前村鳥鳴催蓐食

烏桕蔭我牆白茅覆我屋荷蓀朝出耘依依暮歸宿少  
婦勤織縫諸孫解樵牧秋風禾黍收寒日照原陸鳥雀  
啾啾鳴園籬多草木官租及早償莫待里胥督

新水漲荒陂芸芸稻盈畝東家及四鄰世世結親友夏

至熟黃瓜秋來釀白酒新婦笑嘻嘻小兒扶壁走門口  
沙溪清垂垂幾株柳醉卧夢羲皇涼風入虛牖近說明  
府清征徭曾減否

棗花落靡靡一犬護柴關節序屆芒種何人得幽閒蛙  
鳴池水滿細草生階間刈麥欲終畝風吹雨過山大兒  
早未飯歎息農事艱豪貴本天命悠悠不可攀

山中作

夕景延澹陰微曛射林屋無營見道真塵紛悟蕉鹿此

意幾人知沈吟俯脩竹

高齋臨曲沼雲澹微雨餘悟靜愜沖素泛觀莊老書微  
言苦未解日暮將何如

灣河舟中呈鄭廷韶吳景端

朝發燕山陽暮宿灣河測高樹蔚繁陰浮雲淡無色  
彼西日馳憂心恒惻惻賴我同心人相期崇令德

屠勲

題畫寄楊應寧

頽雲濕不飛釀作楚江雪林木凍已僵汀葦吹欲折荒  
村煙火稀野寺鐘聲歇端居思美人千里成濶別天寒  
鴻雁宿地僻音塵絕囊琴誰共彈悵望頗鬱結貽此瓊  
華圖聊以表高潔

周瑛

感興

持刀斫月光月光何曾斷縛帚掃樹影樹影依然滿人  
皆惡樹影礙此月明多樹根苟不拔其如月明何

馮蘭

奉荅木齋病起見懷二十韻

海氣明曙霞湖光渺秋昊十月木未霜楓林景逾好疎  
疎籬下花寂寂澗邊草閒居田事休委巷人跡少東瞻  
牛屯峯秀矗雲之表種梅已成蹊中構一亭小謝公有  
好懷藉此以終老佳辰縱嬉遊真境越清悄倚酣或高  
歌興與秋空杳一卧動逾月予懷幾昏曉得詩知強健  
頓紆腸九繞古人慎養生弭疾今須早周爰重勿藥莊

篇戒如槁金蘭久要義歲寒願相保詩古意與長三復  
開素抱喜公眼增明萬象都了了南齋冬日暄遺編得  
幽討擬尋亭上盟牽舟汝湖道梅溪香欲浮苔石淨于  
掃扶杖我能陪公無笑潦倒

吳寬

與啓南遊虞山

我本不飲人愛山如愛酒春遊亦易事出戶即掣肘決  
策為此行所幸得良友譬彼足病弱扶掖乃能走虞山

遙在望豈意落吾手側足亂石間縱目平湖口賞心雖  
云樂弔古悵然久丹井事有無刻銘覆華構如何梁昭  
明書臺蔽林藪

山下有葛洪丹井宋學士景瀛  
為銘又有昭明太子讀書臺

再次韻荅時暘飲後見貽

淙淙簷溜垂此事久亦寡移書防漏濕矮屋初墮瓦久  
旱雨固好墊溺念郊野況復南樓人百步隔詩社清池  
下幽禽坐對共閒暇妙墨尚在函濁醪復盈尊持此欲  
就之泥深沒羸馬疎慵幸免朝早謝鳳池賈風低碧篠

叢帳望西窓下

記園中草木

槐

東園憶初購糞壤頻掃除牆下古槐樹憔悴色不舒況  
遭衆攀折高枝且無餘愛護至今日濃陰接吾廬數步  
已仰視偉哉鉅人如非藉此蔭庇誰結幽亭居立爲衆  
木長奴僕櫪與榆

榆

始我種三榆近在亭之左西日待隱蔽陰成客能坐七  
年長漸高密葉已交鎖生錢聞可食貧者當果蓏其一  
忽憔悴嚙腹緣蟻螺持斧欲伐之材未中船舵榆性堅  
可為舵  
藤蔓方附麗不伐亦自可古人無棄物守圃常用跛

檜柏

檜柏性相似安論不同形城南久移植用以護幽亭檜  
也漸生粉柏兮復垂鈴幸非兩石間自足全餘齡古槐  
雖老大秋到即凋零園空霜雪冷見此獨青青

槿

南方編短籬木槿每當路北地少為貴翻編短籬護要  
知一物耳貴賤以地故夏末蕊累累生意含曉露花開  
亦可觀別種更相妬獨憐一夕間顏色已非素蕊多固  
應爾此理真自悟不見萱草花開落只朝暮

竹

翛然數君子落落俱長身東家每借看步去不嫌頻移  
栽幸許我已自前年春自我得此輩園居豈為貧但憂

積雨霽日暴少精神終然勤灌溉枝葉還如新因茲悟  
為學黽勉在斯晨

酴醾

酴醾發長條叢生類著草每記衆花開此種開獨早南  
方色多紅黃色見者少但嫌易零落蜂蝶食不飽曲闌  
強遮護童子日必掃花落當復開豈似主人老肯枉詩  
客來覓句步頻繞載誦成感傷誰來慰幽抱

決明

黃花隱綠葉雨過仍離披不為杜老歎未是涼風時服  
食治目青吾將採掇之不須更買藥園丁是醫師

蘆

江湖渺無際彌望皆高蘆蘆本水濱物久疑平陸無移  
根偶種植溝淺土不污縱橫勿徧地葉捲多葭莩白花  
可為絮長幹須人扶每當風雨夕蕭蕭亦江湖宛如扁  
舟過榜人共歌呼浩然發歸興豈為思蓴鱸

謝屠公送西域眼鏡

眼鏡從何來異哉不可詰圓與莢錢同淨與雲母匹又  
若台星然兩比半天出持之近眼眶偏宜對書帙蠅頭  
瑣細字明瑩類椽筆余生抱書淫視短苦目疾及茲佐  
吏曹文案夕未畢太宰定知我投贈不待乞一朝忽得  
此舊疾覺頓失謝却撥雲膏生白訝虛室扁鵲見五臟  
未必有奇術隨身或持此遂使目光溢世傳離婁明雙  
睛不能沒十年黃壤間化此直百鎰聞之西域產其名  
殊不一博物有張華吾當從彼質

楊一清

和楊鏡川學士先生遊南園詩韻

官居僅旋馬致客真無謀諸公不我棄枉駕同郊遊韓  
家好庭宇石徑通林丘輕風散炎溽白露淒以秋泉脈  
灌畦潤槐陰當屋稠地僻境逾靜身閒心更幽寒芳步  
南渚觀稼來東疇高情不在酒而況饌與羞詞林有鉅  
筆古調難為酬豈徒慰孤陋亦足消煩憂顰眉擬相效  
出吻還自籌惟餘江山興歲歲無窮休

舟中雜興

繫舟蔭高樹挂席揚天風夕照變巖姿白雲行水中塵  
慮忽以忘豁然心境融緬懷十年前何事不匆匆倚杖  
看牛斗銀河麗層空扶桑豈無路清淺元相通晞髮吾  
所願至人苦難逢

舟行及秋霽秋色明葦葭天高柁樓淺日落帆影斜故  
鄉在目中澄江淨鷗沙愧非能賦才有句不足誇暮聽  
金山潮朝餐北固霞持此不啻足悠悠送年華衆手劇

雲雨長途多覆車泯泯復波波浮生當奈何

文林

永嘉縣齋寫懷

墨綬垂青絲銅符寵卽秩駕言謝朝行出領滄海邑  
脈辭親知依依去鄉國淊行僅千里已在東南僻地遠  
煩刑誅年貧正艱食自顧書生愚疇堪付休戚流移已  
懷慙征斂況余職平生跌宕懷雅志山水適及此永嘉  
遊清真信靈域豈無康樂情坐有民社責斂板事承迎

鈎稽困文籍拂意不能歸自愧陶彭澤

首夏齋居即事

幽齋坐織雨綠樹繚周垣青山在屋上好鳥如晤言一  
官居野寺性本愛丘園松花飽日夕沆瀣供朝飧遊神  
羲皇上形槁心獨存緇塵暗岐路吾方掩柴門

訪石田有竹莊

冥冥三十年役役遠行邁人生各有寓參商發長喟歸  
來五載游會晤一何憊君如九臯鶴巢穴故然在茲來

勿厭遲瞻望已足快昔樹今成行書屋添多廨大兒玉  
樹枝小兒亦瀟洒登堂禮阿母出孫呼再拜開宴列肥  
甘賓主聿相對杯酌亂觥籌謔浪或至再春氣陡鬱蒸  
風雨來冥晦樂極精神移狂歌增慷慨

### 謝遷

#### 早過山莊避暑次陶公韻

侵晨理孤棹山居將避喧好風忽南來吹我烏帽偏宿  
鷺未移渚落月猶在山候門兩稚子問我何時還高山

與流水此意向誰言

王鏊

己巳九月舟次相城

幾年約茲遊為訪石田叟石田今已亡不使此言負相  
知三四人挈舟過湖口行行抵相城自卯將及酉四顧  
何茫然天水合為藪茅屋數家存荒蒲與衰柳本來魚  
鼈宮自合鷗鷺守始田者為誰餒也非自取有司事誅  
求亡者十八九念此為傍徨獨立延佇久作詩當風誼

以告民父母

馬中錫

擬古

行樂秋水濱蕭蕭木葉下  
僮僕知我勞凭肩健于馬  
歸來憩柴門返照射簷瓦  
聊復一長歌曲終和良寡  
寒鼓遠聲微疎簷響秋雨  
林空萬葉殘一一委庭宇  
獨卧掩荆扉沈疴久難愈  
感之坐天明所念非三釜

秦璣

閒居

絃桐不終曲坐起囊我琴非憚摩拊勞所嗟無賞音中  
心潛鬱陶曳杖循空林松風有古意石泉清俗心愛此  
愴忘歸前山生夕陰

伊乘

遊虎丘

舟行山在眼到門山忽失去郭僅七里攀磴窮百尺巖  
姿互明晦潭影杳深黑步倦松暫憩醉眠草堪席不逢

試劍人猶覩試劍石臺殿半空起雞犬下方隔經聲雜  
梵唄禪定悟空寂晉唐歷劫多劉白不世出闕劇固殊  
調登覽各有適重来預作期昨遊宛然憶了性未有因  
寓形何苦役依此憺忘歸于焉永終日

林俊

鐵門扇

瀼西一舍許兩山勢迴合巨石狀城門鐵衣護周匝楚  
蜀相犬牙乾坤互闔闔當關一夫守萬馬不敢發雲龕

入玲瓏元氣深吐納風搜羣竅開水樹聲互荅推蓬暫  
此清巫山事雜沓

陳璠

曉經分水


卧聞水禽聲推窓看分水低岸雜芰蒲吳淞宛相似波  
澄綠漪漪流急清駛荇舞翠帶長鷗翻白雪比垂楊  
遷嬌鶯柔莎露遊鯉分明一鏡開身在鏡光裏停橈緩  
緩行神爽情亦喜我苦思歸人鄉問將近矣

黃珣

應制勸農

四民皆天職嗟農獨苦辛所以古哲王巡省及茲辰蕭  
鼓吹豳頌訓迪良諄諄東郊土脈動好鳥鳴芳春桑園  
拂其羽催耕一何頻乘時播嘉種原隰交畇畇念茲民  
所天珠玉安足珍一日苟不作飢寒將立臻勿惜霑體  
勞但憂年歲屯霑體勞尚可歲屯傷我民憶昔先皇時  
端居軫郊閭載歌憫農咏丕揚列祖仁禁苑藉千畝雨

暘雩百神玉食豈不足貴令四海均九重尚結念況爾  
 謀其身古人有良言歲計在于寅豈伊公家賦父子亦  
 以親春風正發育萬物皆鮮新勉矣東作力疇看西成  
 裡



總校官庶吉士臣侍朝

校對官檢討臣蕭九成

謄錄舉人臣傅瓌芳